

पँद्य समयिक्य्

अर्जन देव मजबूर



Source: 'pãdⁱ samyikⁱ' by Arjan Dev Majboor in Persio-Kashmiri Script.
Year of publication: 1993.
Transformed into Standardised Devanagari-Kashmiri by **M.K.Raina.**
Work completed on 15 May 2005.

म्वख

हेत्र पांचालव स्वसराय करुन्य
 कुटुकाल वतन व्यखचारुक्य दिह
 अख शोर शराह पोज़ द्रीठ नु केह
 खँत्र नीलु क्वंडस मंज व्यथ वापस
 बेयि ऑर कॅरिथ सॅरपिन्य हिश बीठ
 वॅथ्य सोपनस मंज मदुमॉत्य मचर
 चॅज बुर्जु पशव प्यठु पोशि फुलय

कर तामथ सॅद्रन म्युल ह्यु गव
 रेह आतश बालन ब्वन ब्वन वॅछ
 मॅत्य आकाशस कॅर्य दुह्य अम्बरव
 जु्रियाथ बचॉविख नावि अंदस

कथु गोर अख बालु दँदिस लॉरिथ
 पाँत्रॉल्य ड्यकस प्यठ कोंसरनाग
 नखु प्योक ह्यु शूबान गंगु बलस
 प्यव लेदरि बॅठिस प्यठ थनु आदम

वॅछ नागु अपसरा सती सरस
 ख्यलु वॅथरन शबनम छॅकुरोवुन
 अख छाल तुजिन अख डाल दिचुन
 प्यठ म्वख्तु बॅठिस हरम्वखु किस चॅज
 खँत्य सँदुर्य सरस स्वनहॉर्य कलश
 नॅट्य नार्यव चव अमृत मर्गव
 प्रागाशन बालु थंग्यन कोर ज़ूल

दरती हुंघ दिवता आयि च्रँसिथ
 अथु डोलुख लोत लोत गासु क्रँचन
 पतु शंगरँफ्यु शीलन मीठ्य दितिख
 स्वंजलि हेत्यु वाहरुन्यु वीग्यु नबस

इनसॉन्यु स्यजर तोर बालु अपोर
 अथुवास पिशाचव नागव कोर
 पॅक्यु व्वत्रस कुन गाशिर्यु अमनुक्यु
 यखलास न्यरल शिव शांती गव
 दिन्न संतूरन मिलुन्नारुच लय
 रेष्पु वारि ग्यवुन ह्योत सू हम सू

कथ सासु बद्यन वॅरियन हुंज प्रॉन्यु
 कथ जन्मन हुंज, अंदु रोस्तुय कथ
 वसवॉस्यु च्रिह्यन मंज बाँविथ गव
 यिम यादु वॅतुर्यु कॅह सौबरॉविथ
 अँतलास वॅलिथ स्वनहॅर्यु सोचिक्यु
 अख नोव आलम तखलीक कोरुन

★ ★ ★

गवडन्युक सर्ग

डलस तरवुन छे संगरमाल सौंचान
 यि तौरीखी शहर अज़ क्वाज़ि वॉरान
 शिकार्यन रोव करुन मॅशिथुय छु गोमुत
 स्वंदर औद पोख अमा कवु काँपुन्योमुत
 यि पब्रथ क्वाज़ि पथ कालस दिवान वॅन्य
 छे ओश हारान पथुर गॉमुन्न छे न्यथु नॅन्य
 कमय अज़ दरगहन व्वसु द्रवस छे गॉमुन्न
 देविन्य कांछा छे मा अँद्य पॅख्य मतेमुन्न
 वज़ान गंटायि अज़ कुनि मंदरस मा
 अमा अंदीर्य वॅछमुन्न शहरसुय छा
 बसन अंदर छि अज़ खामोश सॉरी
 बिहिथ सीटन छि गॉमुत्य लॉर्य लॉरी
 छि बाज़र खाल्य, वानन प्यठ नु वॉनी
 छु बासान ज़नतु छुनु कांह काँसि ज़ॉनी
 मकानन नार डीशिथ कांह नु प्रारान
 वॅदुल खॉली कुनी छुनु कांह ति पुरसान
 समान बल, यारु बल, सॉरी परेशान
 कुठ्यन अंदर छे खूचिथ छायि वातान
 मलाह छुनु काँसि क्रख लायान दूरे
 पकान कोचन अंदर लुख चूरि चूरे
 मे बासान छुम शहर दारुय छि चॅल्यमुत्य
 बहारन हुंघ निगाह दारुय छि गॅल्यमुत्य
 करान कांह गनपतस अज़ कोनु ज़ॉरी
 चॅडा आमुन्न अँमी वॅल्यमुत्य छि सॉरी
 वदुन प्रथ तर्फु गोल्यान हुंघ निशानय
 व्वज़ुल वावाह छु वोथमुत आसमानय
 गछान छिनु मीठ्य आलव च्नीर्य शामन

छे गॉमुन्न दुह्य छ्यवय स्वनहॉर्य गामन
 हवा अज़ खूच्य् खूची पॅद्य छु त्रावान
 फिज़ा रूज़िथ गोमुत शशदर अवेज़ान
 कथा बाथा कॅरिव कॅछा वॅनिव सॉ
 अमा यथ कुस वकानय गव, सॅनिव सॉ
 यपारे बालु वक रूज़िथ छु गोमुत
 स्यठाह दूर्यन गॅन्न वॉराग आमुत
 अमा कुस चॅक्रु फ्युर अज़ बारसस आव
 गॅछिथ वॅक्रे गृहुद कुस सन नबस च्राव
 अॅशिस गॅय डेर अँदरी प्रॉर्य प्रॉरी
 छि वॅक्य् थॅव्यमुत्य् वतन दिथ ज़ोरु तॉरी
 वनव क्याह ऑस्य् यिम गर वॉल्य् सॉरी
 दूलाबव लॉग्यमुत्य् छी त्यम्बरि नॉरी
 छि आगरन हुंघ मुहॉफिज़ तावि लॅग्यमुत्य्
 स्वर्ग त्रॉविथ छि यिरवुन्य् नावि लॅग्यमुत्य्
 गरिच वथ सौपनु मायाये छि गारान
 पनुन ओलाह व्वपर जायन छि छारान
 दमाह अख आबु छूलो यूर्य यिज़िहे
 छॅरुय नज़राह च्चु पोशे नूलु दिज़िहे
 असीरन हुंज़ वनन गॉमुन्न वनय क्याह
 ज्यनय इनसाफ शायद आलमस मा
 जुदा मॉलिस निशे अवलाद साँपुन
 छु मा मोलूम कुस कथ शायि लोगुन
 यि कुस वक्ताह, यि क्वस अंदेर वॅछमुन्न
 सियाह ज़ूना वेखुन्न आसमॉन्य् खॅन्नमुन्न
 अमा यिम रॉव्य् तिम जानानु कर यिन
 श्रॅपिथ मेन्नि गॅय, तिमय दुरदानु कर यिन
 वनख ना जाफर्यो लेदरिस गवलाबस
 छि कॅशिर्य् क्याज़ि सॉरी दर अज़ाबस
 च्चु वनतो वावु छा हमसायि वारय

मुलाकाथाह बन्या ज़ांह म्यानि यारय
लगय पाँचालु च्य कर पासबॉनी
हँदुर्य व्वश जायि जाये सोज़ म्याँनी
अमा ऑखुर यि विज व्वन्य् सोरि ना ज़ांह
दँछिन्य् अँछ पोशि वारे फोरि ना ज़ांह
वँरिव कांह पाय यिनु गछि हा यि रेष्प वॉर
मे नज़रन दग, अज़ाबस लूसमुच्च कौर

★ ★ ★

वचुन

सॅमिवय संगरमालव
वॅस्यवय पेठ्य पांचालव
माजि कॅशीरि वनुनावव
सॅमिवय संगरमालव

शहरन वतु शेहलावव
घामन ओश वथरावव
अमृतु रूदा वालव
सॅमिवय संगरमालव

दुय तय नफरत गालव
संगरन गुल फवलुनावव
लोलाह वति वति छावव
सॅमिवय संगरमालव

व्वंदु अख अॅकिसुय बावव
गम तय मलालु अॅस्य त्रावव
जोदथ पनुनुय हावव
सॅमिवय संगरमालव

सॅमिवय संगरमालव
सॅमिवय संगरमालव

★ ★ ★

दोयुम सर्ग

शोकुक आलम ह्यथ संगरमाल
 वॅछ बालु दँदिस पोत जूना हिश
 अँगूर्य अँछव नज़राह त्रॉवुन
 अँद्य अँद्य ओस आबुय आब नचान
 अनु हॉर्य अमारुक ब्रम ह्यू गोस
 मनु मंज़लिस मंज़ शिंक्या तेल्योस
 दिवदौर्य हवा ओस शेछ बावान
 ख्वनि पोश रँटिथ दूछि छँकरावान
 शोद साफ सराह अख सोन ड्यूतुन
 मुदया कॅरनस तय प्रज़नोवुन

नपु नपु करवुन र्वपु थाला ह्यू
 क्वदरतुचे ख्वनि मंज़ मालाह ह्यू
 च्चिनुन क्याहताम मदहोश सपुन्य
 नखु आबस गँय बे होश सपुन्य
 थोकमुत छ्योनमुत संगरव रोछमुत
 अख लोलु होताह प्यव वॉतिथ ओत

★ ★ ★

वचुन

बॉल्य् बॉल्य् वॅछखय संगर मॉली
 लॉली च्चु कसुय प्रारान छख
 बोलुवुन्य् जानुवर आमत्य् सॉली
 लॉली च्चु कसुय प्रारान छख
 पोश हय लागय नील्य् व्वजॉली
 वनतय च्चु कवय थारान छख
 ज़ार म्यॉन्य् बोज़ तय पोशे डॉली
 लॉली च्चु कसुय प्रारान छख

संगर मालु वचुन गव कनुनुय
 वनुनुय मंज़ वोथ शाह पॉज़ा
 ह्यस आस लोलुक रस छुस सनुनुय
 रसु रसु मनुनुय कॅडनस व्वठ
 नखु आयि संगरस ह्योतुनस वनुनुय
 पनुनुय छुख वन कति प्यठु आख

सहरॉव्य् वतन हय पॅद्य लॉरिम
 सिरसॉव्य् वनन मंज़ दूह पॉलिम
 अनहॉर्य् वुछिम कॉत्या मंज़र
 पोत वन, अमृथ स्वनु सॉव्य् सहर
 ओद, शूच्य् विहल, आबुक्य् कौसर
 पेठ्य् बुर्ज़ कुल्यन वुडवुन्य् कोतर
 यकायक आसमॉन्य् आवाज़ भूज़ुख
 “गॅछिव त्वहि दाय द्युतमव लोलु वाल्यव
 अमर रूज़िव, अमर रूज़िन तुहुंद लोल
 चॅलिन त्वहि दूशवुन्य् आज़ार तय होल
 सरस नीलिस वुज़ान अमृथ अचानक

चेयिव फिर्य फिर्य चैयिव, रूज़िव सलामत”
यि शैछ बूज़िथ नोवुय रंग रुफ फ्यूरुख
दिचुख डाला तिमव अदु गथ करुन्य हेत्य

★ ★ ★

नग्मु

गूरु गूरु करुहोय वावो
छावू छावो छावू लोल
यावनुके नवि चिकु चावो
छावू छावो छावू लोल

थदि रॉयिल के लॅहरावो
निख ना असि पानस सुत्त्य्
येति ख्वश छुय तँतिथुय त्रावो
छावू छावो छावू लोल

रंगु रावलु नतु वन कावो
दुनियाह छा कावु येनिवोल
व्वलु साथा व्वंदु शेहलावो
छावू छावो छावू लोल

नखय अख बोड पलाह वाहराव दिथ ओस
योहय मसकन तु अँथ्य् खोरुय तिमव बोश
पकान गव वक स्यटाह आरामसुय मंज़
न आगाज़स न ओस अंजामसुय मंज़
न बाज़र ऑस्य् नय गामुय जुवान ऑस्य्
न हॉकिम ऑस्य् नय बाजुय दिवान ऑस्य्
न द्यारन हुंद चलन नय कार या बार
न गरवेठुय न ओस कांह शौहरु दरकार
अथन मंज़ ऑस क्याह तामथ करामथ
वुठन फिसराय चेश्मन मंज़ तरावथ
पकुन फेरुन नचुन तरफातनुय ओस
वुछुन ज़ानुन, सरुन, कासुन ड्यकस कोस

पनुन जुव पानु रहबर पानु व्वसताद
 गरुन सामानु प्रथ कांह कॉम ईजाद
 प्यवान ओसुख गहे खोचुन बलायन
 गहर बुनिल्यन, द्यवन, वॉनाख छा़यन
 प्रॅकच ख्वनि मंज़ वुछान ऑसी तमाशाह
 द्वहस अखताबु रातस ज़ूनु गाशाह
 वुरुन वथरुन करुन दिवदॉर्य शाखन
 स्वरुन पथ कुन थवुन कति ओस पाथन
 गहे रूदस अंदर फाकय करान ऑस्य्
 गहे शिशरस अंदर मॅर्य मॅर्य जुवान ऑस्य्
 अमा पोज़ जिंदुगी ऑस मानि छारान
 पकान लोत लोत गहे अॅस तेज़ लारान

द्वहा साँपुन जि संगुर द्राव सॉलस
 पकान युथ मॉलु मोत कांह आसि मॉलस
 वनन अंदर नचान छारान क्याह ताम
 स्यठाह मँज़िल वॅकडिथ तस साँपुन्यव शाम
 बसान अथ जंगलस मंज़ ऑस्य् कम ताम
 स्यठाह वहशी तिमय खूंखार बदनाम
 तिमव येलि वुछ तु कोबू वॅल्य् वॅरिथ न्यूख
 लोदुख गारस तु मंज़ कॉदस बॅरिथ न्यूख

स्यठाह गव चेर संगरमालि डॅल्य् होश
 अमा त्रॉविथ च़ोलुम कमि दादि मे ओश
 ख्यनम मा शाल हापथ व्वन्य् बन्यम क्याह
 वन्यम ना पय तसुंद कांछा वन्यम ना
 गॅयस मा दुय तु नफरत म्यॉन्य् जल जल
 पेयस मा कांह बलाया बारु जोदल

★ ★ ★

व्यदाख

कत्यू छांडथ मे वनतम टाठि यारो
 बु करुहय वाँसि वादन ज़ारु पारो
 बु लायय कोहसारन नाद यारो
 च़ु यिख ना दिल करख ना शाद यारो
 मे पादन दग व्वथ्यम हो छॉर्य छॉरी
 च़ु यिख ना रोशि रोशे पोशि नॉरी
 सुली छायव खसुन ह्योत शीनु संगरन
 असुन ह्योत तारकव मंज़ु बालु खंगरन
 यि नीजर ख्वश यिवुन ओंद पोक तु आकाश
 यि ओँसिथ तोति छुम तलवास तलवास

कुलिम पोशन अंदर आबय छुलन तल
 हलम शबनम छु दॉरिथ वात जल जल
 सँतीसरु क्यन बठ्यन सब्ज़ारनुय मंज़
 रंगारंग कोसमव कोर शादि हुंद संज़
 वुछथ येलि बालु दामुन्य् ब्रोंटु नेरय
 च़े अँद्य अँद्य पानु ख्वश अंदाज़ फेरय
 लशय दँहर्यन करय ज़ूलाह च़ु यिख ना
 सरे शामन परय बाँथाह च़ु यिख ना
 युथुय यिख पोशि नरि हो आलनावय
 अँछन हुंद्य ब्यल पँतुर तॉबीन थावय
 ख्वने ईंदर रँटिथ कँड्य हो बु च़ारय
 त्वले अंदर अशिक्य् दसवानु पारय
 मे छिम अज़ लोल च़िह छ्वकु दॉव्य् गॉमुत्य्
 व्वंदुक्य् आगर छि वँद्य वँद्य आवसेमुत्य्

संगुर छु सोचान :

स्व किछ आस्यम छु मा मोलूम अख ज़र
 यि आलम तँस्य् फिदा करुहन सरासर
 जुदोयी हुंज सुसर ज़ालान अँदरी
 खयालन वेह छु तेलान रुपु स्वंदरी
 कनन गँय ना च्ने म्योनी ज़ांह ति आलव
 च़टान छुस चानि बापत रॉच तालव
 खयालस चॉनिसुय अँद्य अँद्य नच़ान छुस
 गँछिथ देवानु वछ पनुनुय तछान छुस
 अँछन हुंद ओश दज़ान प्यठ नारु तैंगुलन
 ततुर ज़ालान छुम अंगोर्य ज़ख़न
 बनून गुदरून वनय कोताह वनय च्ने
 दिलस तसवीर छुम चोनुय खँनिथ मे
 अगर अँछ डॉल्य् गछ़नय, सोज़ुया वन
 गँडिथ गुल्य् चोन खॉदिम रोज़ुया वन
 मँशिथ सोरुय गोया छुम याद सोरुय
 बहारुक्य् दूह तु लोलुक साद सोरुय
 अंबुर्य रोयस व्वथान ऑस्य् मुश्कि अदफर
 कथस चान्यन अंदर तॉसीरे कौसर
 वन्योथम टोट यावुन पान वौदुमय
 वन्योमय पूशिनय च्ने जान वौदुमय
 वन्योथम वॉसि करुहय नोकरी च्नेय
 वन्योमय म्यॉन्य् पूशिन बंदुगी च्नेय

मुहब्बत जिंदुगी हुंद मुच़ वनय बोज़
 यि अर्ज़थ नेशिनावान लोलु कुय सोज़
 वतव यिमवुय पँकिथ आमुत्य् छि सॉरी
 मगर पोज़ लोल वरतावुन छि खॉरी
 तँमिस माले मे दित्यमुत्य् मीठ्य पादन
 येमिस पथ रोवमुत छुम टोट आदन

तँहुँद्य पम्पोश जुव व्वंदमख मे दूहदिश
 बँरिम दूह वीरि रंद बोरमख मे दूहदिश
 गटन गामन अंदर यावुन छु रावान
 खलूसस द्यल तुलान तलखाबु चावान
 वुछिथ अँगूर्य रोय चोनुय ह्यनय आस
 जुदोयी चानि छुम तुलमुत यि तलवास
 अकीदन फलसफन हुंज कथ छि वखरय
 यि लोलच मीठ वथ तय गथ छि वखरय

अगर म्यान्यन वतन ज़ांह कॉल्य वातख
 मे नय डेशख च़ु ओश यिनु च़ूरि हारख
 वुछिथ आंगुन व्वजारय होश वोली
 सु यावुन शमहुक्क्य पॉठिन च़े शोली
 ग्यवन लँहरा अगर ज़ाह डॉल्य सोज़ख
 मुदय गँडिथुय खयालस मंज़ च़ु रोज़ख
 व्वथन थोद मूद्यमुत्य् बेयि ज़िंदु सपदन
 पखन पॉराव ह्यथ शाहपॉज़ नेरन
 तरन पांचाल ताले चॉन्क्य ह्यथ काय
 मे निश वातन, विसन ह्यथ लोल रहकाय

संगुर येलि खोफ़ सुती अहरनोवुख
 कँरिथ शलखाह पथर बेचारु पोवुख
 तुले मूरन गँडिथ अलहूंद त्रोवुख
 तु लोर्यन माज़ तँम्य सुंद वारु खोरुख
 इशारव सुत्य् वोनूनख क्याह खता छुम
 मुसॉफिर छुस कुन्युक मा पय पताह छुम
 तिमव दोपुहस च़ु कवु छुख योर आमुत
 अलाकस सॉनिसुय मंज़ क्याज़ि च़ामुत
 न्यस्फ़ रॉन्न ह्योतुख ऑखुर सु मारुन
 लतन मँथ्य मँथ्य ह्योतुख दारस सु खारुन

गँडिथ गुल्य् आव सरदारस रँटिन खोर
रवा छा बे कसूरस प्यठ सितम ज़ोर
सपुद रोशन सुबुह येलि काफ ता काफ
बिलॉखुर आव सरदारस ति इनसाफ
संगुर सुबहय कोरुख आज़ाद जल जल
पकान लिथवान ज़ोल बेचारु पॉदल

★ ★ ★

त्रेयुम सर्ग

ह्योत रास गिंदुन अज बेयि बालव
 ड्यक वुशनावुन ह्योत पांचालव
 अखताबन रथ कोर तेज पनुन
 वन यार्यन दार्यन ताफ छोकुन
 शीनु च्चादर लोत लोत व्यगलौवुन
 सतु सौस्य् स्वंजल बेयि वाहरौवुन
 दिथ दूरी नजराह कोहसारन
 बुक आव सँतीसर सुह लारन
 गँय शोहवय हे क्याहताम सपुन
 वरमुल्य् किन्य् आबस दाम द्युतुन
 वँथ्य् मलख तु औद पोक अबसौवुन
 आकार कँशीरे होव पनुन

रसु रसु गव आब वसान पानय
 नँन्य् द्राय जँमीनुक्य् ताह खानय
 दरती वँछ पान पनुन शेरान
 ह्यथ नीज अथन क्यथ मस पौरान
 नँन्य् द्रायि महा अंदकारु तलय
 कस ताम द्यवस निश औस छलय
 महरेंन्य् नवि नावान शबनँम्य् तन
 पानय् यथ सरस्वथ ज्ञान वनन
 पोक सौंतु हवा दिथ पारय आव
 ख्वश पोश गुलन नक वार्यन च्चाव
 अख वादी अख सबजारि सबज
 छुस जोरु नु कांह समसारस मंज
 निलु नाग बँसिथ छुस मंज चेश्मन
 तनि लौगिथ पाट्युव तोन वर्दन

छवु प्रारान यिनु सॉ चेर कॅरिव
 व्वलु तेज़ पकव स्वनु सॉव्य गॅछिव
 पदमॉनी कॅशीर छे थनु पेमुच्च
 आज़ाद गॅछिथ यॅच्च मुशकेमुच्च
 व्यथ ताब्या थॅवहस बुथ छलनस
 क्वंगु च़ादर पॉबरि पॅट वलनस
 ह्यथ ऑनु व्वलुर तस हावुनि आव
 गुल म्यूठ कश्यप ह्यथ बुथ तस द्राव
 ह्योत आरव अदु श्वनि रायि वसुन
 वेथि वथ शीरिथ ह्योत ब्रॉठ पकुन

★ ★ ★

वचुन

आकाँश्य वँछुखय किनु पाताँली
 ज़ायख सानि म्वकु पांचाँली
 शोकु वाय र्वनि हँर्य पोशे ग्वंदरी
 कोत छुय गछुन वन स्वंदरी च़े

हन हन सगुनाव शोकु सान मॉली
 शूबि सान पॉराव अंजॉली
 वँजिनख कॅमि संज़ि माये अँदरी
 कोत छुय गछुन वन स्वंदरी च़े

नाव छुय व्यथ तय ज़ाथ छख नु मानान
 जानानु चोनुय प्यठ काँलास
 स्रेह सोन युथ नय ज़ाह काँल्य हँदरी
 कोत छुय गछुन वन स्वंदरी च़े

ओबिर्वय पोशिनाव सानि वॅशीरे
 बेरे बेरे वाहराव स्वन
 जायि जायि बाँगुर त्रेलु तु अम्बरी
 कोत छुय गछुन वन स्वंदरी च़े

★ ★ ★

वचुन

व्यथु वेंत्रे ज़ायख ख्वश आवाज़
 चानि दर्शनु स्वरगस खोत येंद्राज़
 पुर्य त्रावान छख खामोश खामोश
 शूच्यु लागय वेथि पादन पम्पोश
 छखय हावान सारिनुय सनिरुच वथ
 असि चॉनी सथ, असि चॉनी सथ
 सायि चोनुय असि सरमायि सरपोश
 शूच्यु लागय वेथि पादन पम्पोश

सानि मनु सॅर्य फवलुनाव मायि हुंघ पोश
 युथ नु ज़ाह कॉल्यु असि कांह डाली होश
 सोन अर्ज़ाह बोज़ तय थाव तय गोश
 शूच्यु लागय वेथि पादन पम्पोश

पकान मॉदानुवुय मँज्यु वारु वारय
 करान रूदी शहनशाह ज़ारु पारय
 कोहन बालन ह्यवान औशद च़ु छख मॅल्यु
 छि चाने लोलु सुत्यु बोलुन ह्यवान कॅल्यु
 ज़ुचन हुंघ छख जुव्यन मंज़ ज़ाल येरान
 बठचन चान्यन हवा खोरी छि फेरान
 समय ऑसिन स्यठाह नाकारु या जान
 द्वहस रातस पकुन चॉनी छि पहचान
 सरन, आरन, क्वलन, लॉज़न तु जोयन
 छॅलिथ बुथ छख पकान सीमीन रोयन
 च़े वुछमुत्यु छी अजब विह कायनातुक्यु
 ग्यवान रूज़ुख च़ु सॉनी वाख तय श्रुक

चु फोलरावान छख सौबुल जमीनस
 छलान छख यारु बलनुय दाग सीनस
 हुर्यन मंज छख दिवान पथ कालुकी नाद
 अथव चान्यव छु ना कश्मीर आबाद

पथ कॉली कौसर नागस मंज
 शिनु कुठर्यव ह्योत करुन ग्रजनुक संज
 यी बूजिथ नैदरि विशोका वॅछ
 रंगु नील्य् स्व जामय लॉगिथ खॅच

शीनु कॅदलव तॅल्य् वॅछ श्वशराय
 नीलु पलुवय पेठ्य खॅच खखराय
 क्वंगु वटनस फेरान छायि अय
 पोशि पॅथरे तस वुछनय द्राय

वुछ अँहरुबला महारौनी आय
 तॅन्य् जामु वॅलिथ ननि कायाय
 वेथि आलव दितिनस जायि जाय
 ब्रोंठु द्रायस वुछने शोकु माय

रँब्य् आरन लूकु वचन परिये
 दोब्ज् जॅन्य् तॅम्य् ओबरुक्य् नॅट्च बॅरिये
 दूदु सर तय चंदन सर आये
 सम्बलोव तिमव सुय कमि माये

वोथ शुपयेन्य् र्वनि महाराजाह ह्यु
 सर ताजु वनन वन राजा ह्यु
 लंजि वॅहर्यन सॅन्य् गॅल्य् लार अंदर
 तस ज़ायि वनान बस चोर गबर
 पतु वॉतिथ प्यव संगम जाये

वोल बोनि बलन मंज मायाये

वॅछ ब्रँगी बौबर्य चाल रँटिथ
पकृ पनुनि वँटिथ कोह बाल चँटिथ
द्युत आरु पथे तस मॉल पनुन
क्वलु रादव ह्योछ अदु बॉल्य् खसुन

पॅच लेदुरुच बशाशत अज़लुच ह्यथ
सीमिन्य हिश त्रावान बालन पथ
रुखुनावान स्वंदर शीलु तु पल
वति चावान लूकन शीतल ज़ल

कनि खम्बर्यन कूरिथ नक्श गरान
बे वायि पकान गगरायि करान
हरनागु नखय समखेयस व्यथ
द्वन बेन्यन पूशिन माय तु सथ

कॉलास छु बालन हुंद राज़ाह
तस शेरि छु लॉगिथ र्वपु ताजाह
छिस शीनु कोहिस्तान प्यठ सीनस
यिम गाश छटान मुल्के चीनस
गथ कॅर्य कॅर्य वेखतिस गटु कारस
बजि मानि छि फेरान मानसरस
थोकमुत बोहदूरा काड कॅडिथ
मस सिरिं ज़ुचन हुंद शाल वॅलिथ
दरती हुंद मॉसुम पोथरा ह्यू
गिंदु बाशि करान ख्यलु वॅथरा ह्यू
नतु शांत गोमुत कांह सँदरा ह्यू
या शंकरु सुंद ज़्युठ गोबरा ह्यू
खूनखार सरस मंज शीनुव्य हँस्य

कॉलासस नीलु गछान अँस्य अँस्य
 चेश्मन मंज ह्यथ तसवीर योहय
 शाहपॉज वुडव त्रावान छि दूहय
 नेचुवाह अमि मानसरोवरकुय
 सिंदू या स्यंद यथ नावा छुय
 बँठ्य कूरान बालन नक्शु तुलान
 तस वुछिथुय द्यव द्रॉठाक च़लान
 मदुमॉती वजूदस नोमरावान
 मायायि वतन मंज शोमरावान
 अख तीर अंदाज़ा कामु दिवाह
 दूदु वानि पनुन्य तन ख्वखलावान ।

मरग स्वनु संज छे वाजे हुंद नँगीना
 हरुद अति सौथ तस युस आसि बीना
 अमि मरगय मंजय स्यंद सॉन्य नेरान
 अँती सॉलॉन्य तेंताल्यन छि फेरान
 वेथे अंदर पोतुस शूचर छे छारान
 गँछिथ अर्पन छे तँथ्य मंज पान सारान
 वसुन वुतरायि ह्योत स्वखनाग नालन
 गंडचस युस गुल्य तँमिस छुय शाफ गालन
 ग्यवान तूसी तु बोज़ान तोसु मॉदान
 क्वला तेशल छे चूरी बाग छावान

वुज़िन्य लँज हरम्वखस तय हम्सु दारस
 अँती वोन ब्रह्म सरुनुय वॉसि प्रारस
 दपान स्वख दूख छे अँतिनुय नागु जूर्या
 छि अँश्य फेर्य पारवति हुंद लूल दूर्या
 शुमालस मंज किशन गंगा छु नागा
 अपॉरी रंगु वूरा गोन छु जंगला
 वनान पथ कालि र्योश अख शांडले ओस

मनस तस ओस कोताह बारु हमसोस
 वुछुन बो वाग दीवी शारदा कर
 मंगस पानय दियम वेद्यायि हुंद वर
 किशन गंगायि प्यठ श्रानाह कॅरिथ खोत
 पकान गव ब्रोंह नज़र त्रॉवुन न सॉ पोत
 न्यस्फ तस पान येलि स्वनु सॉव्य सपन्यव
 स्यठाह हॉरान गव सोचस अंदर प्यव
 वुछुन रंगु वारु दीवी अख नज़ान ऑस
 अथन पम्पोश तिमनुय खत तुलान ऑस
 सपुन हर्शस स्व डीशिथ होश ह्यू आव
 पकान गव तेज वन अंदर कोरुन वास
 कोरुन दीवी कुनथ ल्वति पॉठ्य अरदास
 द्युतुस वर शारदाये बख्तु बोड आस
 कॅरिथ दरशुन लोबुन वेद्यायि हुंद बल
 महा सिंधू मंज़य तॅम्य् आबु थॉब तुल
 पथर लोयुन सु कुस माछस करी तुल
 अमी मंज़ु द्रायि मद् मॅन्न साज़ वायान
 मंग्यस युस त्रेश तस माछी छे चावान
 कोलिस वॉतिथ गछान व्वलरस अंदर गॉब
 तॅमिस अतो ब्रोंठ पकनुक छुय नु तरगॉब

★ ★ ★

वचुन

रेश्य वारि अमृथ चाव तय लँतिये
 कती मदु मँतिये माल्युन चोन
 दिवता छी वुछान ब्रोंठु तु पँतिये
 कती मदु मँतिये माल्युन चोन

पोशे वर्शुन शूबी सँतिये
 येतिये साथा कर ठँहराव
 सँदुर तय सर हय दितिथख पँतिये
 कती मदु मँतिये माल्युन चोन

कति ह्यथ आयख कोसम पँतिये
 वनतय बांबर कमिची छय
 लूख छी प्रारान पतु मँत्य् मँतिये
 कती मदु मँतिये माल्युन चोन

क्वलाह द्वहदिश कलस छँन्न पून्न लॉगिथ
 हँटिस सँन्य पोशि माला नॉल्य् त्रॉविथ
 मँदिथ सारान थँन्य् खारान बठिनुय
 व्यतस्ताये अंदर ऑखुर छि वसनुय
 पुहँर्य नालस मछन मंज ज़ोर कौत्याह
 वेथे अंदर वँसिथ लोसान छुस शाह
 व्वतुर्य किन्य् काजि नागाह पादशाह बोज़
 छि रोज़ान मारखोर अति खूच्चिथुय रोज़
 बठचन संगीत वायान पोन्त्य् अमिकुय
 छु त्रँहरान युस चवान शीनु वोन्त्य् अमिकुय
 अमि मंज़ु नालु अख नबु नार नेरान

वतन वेखन्न अंदर सुय खाब शेरान
वेथे अंदर गछान गिंगल नखय गॉब
लये अंदर यिवान सॉरी न्नलान ऑब
किशन गंगा ति वेथि मंज़ व्वठ छि लायान
खयन ख्राशन छे अनहुर पान छावान

★ ★ ★

चूरिम सर्ग

सब्ज मॉदान नॅन्य़ येलि द्राय साँरी
 अचुन ह्योत कॉफिलव छोह मॉर्य मॉरी
 ह्योतुख नागन नखय द्युन बॅस्तियन कुन
 न कुनि द्राँठाक रूदी, रूद्य कति जिन
 कदावर खूबसूरत नील राजाह
 कलस दिथ ओस नीलम न्यूल ताजाह
 बिहिथ संग्गासनस बदनस वॅलिथ तोस
 करान ओस राज़ुसी गाटुल स्पठाह ओस
 ज़नान आरि तरंगा शेरि आसान
 कलस कलपोश अंज़ुल्य़ड़जूज शुबान
 सर्फ़ चाले तिमन पूच्चाह अवेज़ान
 प्यरन नालस ख्वरन पुलहॉर्य़ लागान
 हॅटिस हँज़राह, हले लूंग्या ज़बर जान
 बिलय अँछ आसु तहँज़य ज़ून ज़ोतान
 जवानन साफ़ तन मॅस्ती शरीरस
 होलाह गोंडमुत तु फेरान ज़म हॅरीरस
 ग्यवान गंदरो तय ? ? नच्चान ऑस्स्य़
 पकान पौदुल्य़ वुडान कॅह ऑस्स्य़ आकॉश्य़
 स्वनय मस्तस कॅडिथ सुम नागु कोरे
 सरन मंज़ छालु मारान जोरि जोरे
 ज़ेमीनस तल खॅनिथ कुठ्य़ खूबसूरत
 सजॉविथ बॅद्र पीठस शेव मूरत
 वनन अंदर व्वपाल हाखा गुतुल ओस
 बठ्यन बेरन फकथ मेवन हुंदुय ओश
 नच्चान बे खोफ हांगल ऑस्स्य़ हरजा
 च़लान ओस बॉल्य़ बॉली हरनु फोजा
 शुहुल तॉसीर साँनिस नागु वॉनिस

बलान आँस्य् दौद्य आदर ओस पानस
 जँमीनस छैकरस लँग्य लोल बरने
 दजन वुडरन नयन आबाद करने
 वनव प्यठ आंगुनन अंदर रुविख कुल्य
 स्यठाह अँर्य दँर्य तिमन आँस्य् शूबुवुन्य गुल्य
 स्वचल, लीसाह, नुनर लय गासुसुय बाव
 कुनस, पुदनस तु हाकस लोग चलेजाव
 पंगाह, शोलाह, मकाँयाह मीठ काँचाह
 वचन मेछर तु पँल्य पल डून्य गुजाह
 रटान आँस्य् ज़ाल लॉगिथ मँज्य शिकाराह
 समान साँरी वज़ान येतिनुय नगाराह
 नचान अँद्य अँद्य कँरिथ आँस्य् आरु साँरी
 कलस प्यठ सर्फु ताजाह चांद माँरी

दँछिन्य खोवर्य करुन ह्योत आय लूकव
 निशादव तय पिशाचव सुत्य यख्शव
 कँरिथ हल बल पकान तिम आयि व्वत्री
 चोतुर्य पोज़ ख्यन ख्यवान कँह आँस्य् मँकरी
 व्वतुर्य किन्य दूर मुलखाह आर्याना
 छु युस तहज़ीबुकुय प्रोनुय जहाना
 व्वपासक आँस्य् लुख अति आफताबुक्य
 स्यठाह गाटुल्य तु माँहिर कार कस्बुक्य
 रछान पँश आँस्य् रथ आँसिख सवारे
 व्वनुत्य आँस्य् ब्रोंह पकान गँय वारि वारे
 पशव म्वकु नीर्य तय नयि आँस्य् छारान
 च्नटान मँज़िल तु नँव्य नँव्य देस गारान
 तँरिथ बालन कोहन काफन खसान रूद्य
 लोबुख मँज़िल मगर कँह अडु वती मूद्य
 चँटिथ सहरा अमव, दँरियाव येलि तँर्य
 दिवान गँय डेरु गांधारस तुलिख ठँर्य

द्रविड हिंदोस्तानुक्य् ऑस्य् बँस्यकीन
 स्यठाह रुत्य् ऑस्य् रोज्ञानय्तिम दयस लीन
 सिंधस राजुत वँरिथ दक्षन पकान ऑस्य्
 लडायन हुंज नु खसलथ ऑस्य् गर वॉस्य्
 ह्वदस मंज आर्या ऑस्य् ताक सॉरी
 तवय द्राविड चलान रुद्य हॉर्य हॉरी

हिमालुक हालि मॉदॉन ख्यल वँथुर ह्यू
 सेंदे गंगायि हुंद रोछमुत पोथुर ह्यू
 सिलह सामानु ह्यथ तिम ऊर्य वॉती
 बसॉविख पूर्य कॉत्याह कचु नगरी

करान तिम दिवतहन हुंज ऑस्य् पूजा
 वरुन अँग्नी, सिरी मानान दिवता
 यछान यस ऑस्य् तस ऑस्य् ताज शेरान
 कम्बर गँड्य गँड्य बलायन ब्रॉठ नेरान
 च्यतस ऑसी तिमन मंत्र ज़बॉनी
 ग्यवान ऑस्य् साम, जग ऑस्य् करॉनी
 तिमव ब्रह्मी खतस द्युत यँच चलेजाव
 तिमव वरतोव वेदिक खोरहस बाव
 बनॉविख आश्रम शहरव निशे दूर
 अँलिम वॉफिर कौरुख नज़दीख तय दूर
 जहाज़न मंज रंगारंग चीज़ शीरिथ
 सँदुर मँद्य मँद्य जहानस आयि फीरिथ
 छ्वखाह तिमवय मंजय फोज काशमीरस
 स्वंदर जायाह ड्यकस नूरा समीरस
 सपुद्य जंगजू ति योत यिथ शांत सॉरी
 चँजिख खॉरी तु गँय आबाद सॉरी
 वुछिथ शाँती रेशव ह्योत योर वातुन

वनन मंज दूर कुटियायन द्युतुख कुन
तिमव लॅब्ब्य ज्ञान व इरफानुक्य समंदर
सपुन्य सरशार, ज्ञातुक्य थॅग्य कॅरिख सर
खसान गव रंग तहज़ीबन कॅशीरे
कुल्यव पोशे थर्यव रोट मूरि मूरे

★ ★ ★

पुंयुम सर्ग (संगुर वनान संगर मालि)

मुच्चर अँछ प्रॉन्य खंडर परज़नावुख
 वुछिथ जिगरस अंदर ल्वति पॉठ्य थावुख
 छु वेथि प्यठ डाफ दिथ प्रोनुय यि नगराह
 करान पथ कालि ओस राजाह तु ताजाह
 छे नैदरे राजदॉन्या प्रॉन्य मॉली
 स्यठाह ख्वशवुन्य अमापोज़ अज़ छि खॉली
 अँती परवानु ऑस्य दरबारु नेरान
 ब यकदम जायि जाये ऑस्य फेरान
 मुरुच खामोश, छँकरॉविथ फसाना
 ची फनकॉरी यिहुंज़ु ज्ञानान दाना
 हजर च्चोलमुत तु डोलमुत आयि सामन
 तवय गॉमुव्र तलावन आबु कामन
 छे बालन हुंज़ कलाया इन्तिज़ारस
 व्यतस्ता ज्ञानि छारान कस निगारस

कदम तुल गथ दिमव प्रॉनिस शहारस
 सछि सॉरी लूख पनुनिस कारुबारस
 ग्वडन्य दूरी च्चु नज़राह परबतस त्राव
 वुछख अति वखरु दर्मन जान वर्ताव
 हु प्रदिमन पीठ वुछ ग्वडु ऊर्य वातव
 सखँसिथ च्चक्रीश्वरस केंछा व्यचारव
 छे व्यथ पॅरियाह वुडान ज़न आसमानय
 अम्युक पर्तव प्यवान दर कहकशानय
 महल आबस अंदर अक्स रवानय
 बिहिथ अछि दारि ताकन शोलवानय
 छि नावन हुंघ वॅदुल गॅर्य गॅर्य शहारस

दछय राँठन छु मस पेडान दहानस
द्वदाह गुरसाह छु हॉज़िर जायि जाये
छि मुप्तुय बाँगरावान लोलु माये

डलस मंज़ बालु थँग्य् वँथ्यमुत्य् छि श्रानस
कुल्यव वोलमुत सबुज़ वरदन छु पानस
सर्यत जोराह छि वँहरिथ सीनु शूबान
वुछिथ सरताज़ु मंज़र दिल छु लूबान
छु राजन स्वर्गु द्वाराह खोरमुत जान
अगर स्वर्गस खसुन छुय कर अमिच ज्ञान
छु बीमावत योहय सरकॉर्य छुस नाव
छु गामन बीम शहरन कुन चलेजाव
स्तूपन सुत्य् मंदर जोरि मारान
कुनान मंज़ चाकु वार्यन श्रोग तु अरज्ञान
असान बागन अंदर सरवे रवानु
यिमन अँद्य अँद्य सँजिथ देवान खानु
नज़र योद दूर त्रावख दिल गछी ख्वश
फोलिथ बॅर्य बॅर्य छि आमृत्य् कोसमव पश
दशायन आँठ बाँरव रॉछ पानय
वसान दिवता येती आँस्य् आसमानय
येती गौतम बुद्धस सुत्य् शेव शंकर
विहारन मंदरन गँज़रान बराबर
विसान ओस हॉरवन क्याह नाँग्य् अरज़ुन
सु आँलिम शूब साँनी शूबि ज्ञानुन
बसावन ब्रॉठ कुन नवि राजदाने
प्रवरसेनुन शहर मा ज़ाह ति प्राने
छि आमृत्य् दोर कम कम यथ वँशीरे
अमा पोज़ रुज़ शोलान सानि वेरे
पथर ताजो तख्त काँत्याह प्यवान वुछ
ब-सख्ती ज़ोर काँत्याह लुख गलान वुछ

वलेकिन नक्श केंह सीनु वुन्य् छि रोज़ान
असर युहुंदुय छु सँदियन ताम पोशान

यिथ्यन नक्शन अंदर सोन नक्श दौयिम
कुशानन हुंद बजर यँच काल कौयिम
तवौरीखन अंदर शूबान पथ काल
दिमव वोन कल्हनस, हसनस करव साल
स्यठाह ओस नामवर वलु वीर राज़ा
नचुन तरफातनुय तस ओस कारा
छु तँम्य् सुंद नाव थ्यकुनस कुल जहानस
कोरुन काराह तु नावाह न्यून पानस
सिकन तहँघन म्वखस दिवता निगहबान
सिरी प्रज़लान यूनानुच करान ज़ान
छि बँड्य अवतार ईरानुक्य् सनाख्वान
तु हिंदोस्तानुकी शिव, बुद्ध मेहरबान
शुमालस छठ कँडुन तूफान सुय ओस
कोरुन मा बस, तु ज्यूनून टोर यथ प्योस
कशूनाह ह्यथ सु गव बंगाल ज्यूनून
मगध मौँडुन पद्यव उतकल ति म्यूनून
द्युतुन कुन तिरमिज़स मंज़ राज़दाने
अजब शहरा बनोवुन युस नु प्राने
स्तूपा अख सु मशहूरे ज़माना
बनोवुन दर पेशोवुर आस्ताना
हवौई तीर यथ शिखरस नज़ान ओस
सिरी त- फीर्य फीरी गथ दिवान ओस
हवा येलि मीठ्य गंटायन करानय
वज़ान ऑस्य् सासु बँद्य सेतार पानय
द्वहय अति ओस शामन ज़ूल आसान
करान ऑस्य् बोद्ध दरशुन मूक्ष प्रावान
देवारन प्यठ खँनिथ ज़ातक कथाये

संदूकन पोथि बॅर्य बॅर्य जायि जाये
 सब्ज रँग्य राजु होंजन मालु नॉली
 यि गॅरमुन्न संगतराशव ऑस डॉली

बनॉवुन टेक्सिला उजैन नगरी
 छु पटना ताशकंद नामी कोसम्भी
 नज़र साकेतसुय कर राजगर वात
 कनस पोरस छि लॅजमुन्न ग्यानु वॅहरात
 फनि गांधार मथराये कोरुन म्युल
 नव्यव तॉमीरवुय रोट प्रोन अंजुल
 सपुद्य भिक्षु शुमालस कुन रवानु
 छु रोशन नाव तहुंदुय दर जहानु

क्वंडलवन अख गुपिथ जायाह छि अज़ ताम
 सुबुह अति ख्वश युवुन सिरसॉव्य छुय शाम
 महायानस अँती लोगमुत छु ज़ायुन
 बुद्धव ह्योत बोदि सतवन नाद लायुन
 जॅमीनस तल खँटिथ अँलिमुक्क खज़ानय
 यक्ष छिस रॉछ कुनि छुनु कांह निशानय
 योहय वन हॉरवन नखु आसिहे मा
 छु दिल म्योनुय दिवान अमिची गवॉया
 बु छुस सोपुनस अंदर न्यथ ओर वातान
 अँती छुस केंह नु मंज़ु क्याहताम छारान
 यिवान शाँती मनस कल्पुन ह्यवान च्यथ
 दिवान क्वदरथ सन्यन सीरन छे अँत्य वथ

छु व्वथबव योद स्यटाह प्रथ कारुबारस
 अमा पोज़ लूक मोत छुय इन्तिज़ारस
 छु क्याह लारान दर शाँही प्रज़ाये
 दपान लक्ष्मी पकान छय छायि छाये

वलेकिन अख कथाह फखरे ज़मानु
छु धर्मन पानु वॉनी दोस्तानु
छु शॉहिद अज़ ति यथ समवत कुशानु
बसान ऑस्य् बोद्ध हेंद्य शानु ब शानु
प्रकथ मिलुच्चारुची रेष्प वारि पूशिन
संगर माले संगर हर सातु तूशिन

★ ★ ★

शेयुम सर्ग

परसपोरुक्य निशानय रॉव्युमत्य् छिम
 खँनिथ दर दिल मे तिम रँछरॉव्युमत्य् छिम
 छु बुद्ध त्रामुव अँती आकॉश्य् खोतमुत
 अँमी विश्णु र्वपुट्च बर सीनु रोटमुत
 स्वंदर ओस शेवु मंदर शूब्रॉविथ
 हिशर त्रन फलसफन अति साफ हॉविथ
 यि नगराह छुय दिवान अलकापुरी पथ
 अँती अँद्य अँद्य नन्नान बासान परबथ
 करान दरबार अति ओस राजु आला
 तँमिस प्रारान अँसी हॉकिमो शाह
 दूहा साँपुन ज़ि मँस्ती राजु सुय खँत्र
 अजब रंगाह वुछिथ थर सारिनय वँछ
 वोनून हुथ राजदाने च़ुख दियिव जल
 अँनिव हुक्मे शहानशाह तेज़ बामल
 स्यठाह गाटुल व्ज़ीरा आव तहजील
 हमीं दम हुक्मे शाहस सपनि तामील
 अम्बर गासस कँरिथ थँद्य खॉरिहस डेर
 द्युतुख तँथ्य नार वुछने द्राव सुय शेर
 पतव लाकन अमा होशस सु येलि आव
 स्यठाह क्षूबस गँछिथ शर्मदु सपन्याव

खँसिथ हँस्तिस् दिवान तूफानुनय पथ
 सरवानु गव स्यठाह बँड लशकराह ह्यथ
 नटुन ह्योत सारिवुय मुश्किल छु व्वन्य् साथ
 खबर कस अँस, करि कॉत्याह फतूहाथ
 यि बूज़िथ हुक्मरानन अँहरु ह्यु च़ाव
 कूटय राजन तुलान गव हरदुकुय वाव

दपान जमनायि प्यठु कॉली नदी ताम
 यशो वर्मन करान राजाह ब अंदाम
 मुकाबल पादशाहस ब्रोंटु येलि आव
 वुछिथ लशकर तॅमिस फॅट वावु मँज्य नाव
 गँडिथ गुल्य नामु सलहुक आव लीखिथ
 कदम तुल लशकरन ब्रोंह राज ज़ीनिथ
 गुर्यन हुंज गर्द आसमानस वलान ऑस
 पयापय शोर डीशिथ वथ च़लान ऑस
 वुडान गव वाव विद्याचल कोरुन सर
 ब कावेरि दिवान गव खुमु लशकर
 कॅरुख गरमी ब आबे खूपराह दूर
 शहमे कश्मीर साँपुन वारु मशहूर
 सतन दीपन गँछिथ ज़ीनिथ तिमन आव
 कॅरिथ सर खम सु पूरी दारिका च़ाव
 विजय प्रॉविथ सु वापस राश ह्यथ आव
 कॅशीरुय द्रायि बुथि तस दारु येलि च़ाव

मराज़स मंज़ छि जाया नाम नॉमी
 करेवाह अख अता तथ छय गरामी
 नच़ान वादी चे अति दूह रात बासान
 कुल्यन खेतन तु लूकन नाद लायान
 छे ऊषा ओर वॉतिथ पान नावान
 सिरी दिवता तॅमिस वरने छु वातान
 बिहिथ तथ बालु ताले बॅर्गु शेखा
 नमान साँरी करान शक्ती छि पूज़ा
 व्वथान येलि शीनु संगर मेछि नॅदरे
 दिवान गथ ज़ितनि गौद्य ह्यथ दँदरि दँदरे
 यि मंज़र वुछ फ्वली दिल गम गछी दूर
 त्रुवॉहिम सिरिं अँत्य व्वतलान पुर नूर
 खँसिथ तख्तस पनुन रथ पानु शेरान

हयातुक लोल ह्यथ बुतरॉन्न फेरान
 अँती कँर जोतशव जाया मुकरँर
 शहन कोर मारतंड तॉमीर यकसर
 रसदगाह अख कँरुख कॉयिम ब-जल्दी
 नन्नान यथ मेहर ओस सहरानवरदी
 लुकव वोन बालु पँत्य् अखताबु नोन द्राव
 र्वपँट्य फरशाह च्वपासे वहरनय आव
 देवारन प्यठ वसान गंगो जमन वुछ
 थम्बन ताकन तु डोर्यन हुंद चमन वुछ
 यि तॉमीरा वुछिथ हन हन छे लूबान
 'सवारे जानवर' दर नक्श बोलान
 देवारन प्यठ खँनिथ नक्श नु शूमार
 चँकुर राशन हुंदुय नन्नवुन्य् छि आकार
 वँरी मासन दूहन मंज बॉगरॉविथ
 सितारन हुंद अँलिम टाकारु हॉविथ
 यि तिर्थन मंज स्यठाह थोद ज्ञान तीर्थ
 लगान ओत यात्रा ज़ाह मा छूयनान वथ
 अँती नीरिथ छि अम्बरनाथ छारान
 पहाडन मंज जटा शंकर छि गारान

गँछिथ कालिंग पतो बंगाल वॉतिथ
 छँडिथ कोंकन उजैनी आव ज़ीनित
 बुखारा ता बलग वॉतिथ कोरुन बस
 हमान आँखु छि तीज़ी तेज़ वावस
 नखस हँथियार ह्यथ तुर्कव च़लुन ह्योत
 ब-जल्दी तापु सुत्य् शीनन गलुन ह्योत
 शहे कश्मीरनुय द्युत सॉरिसुय वोज
 वलेकिन ओस थोकमुत व्वन्य् तसुंद फोज
 यज़थ रोछरुन तु पानय मोर कोर तँम्य्
 निगीनव कॉशिर्यन दामानु जोर तँम्य्

स्यठाह गव चेर व्वलु व्वन्य् बॉल्य् नेरव
 तरव अँस्य् होलदा ल्यतुपूर्य् फेरव
 सिरी मंदर छु वेथि प्यठ शूबोनुय
 यो सिरियाह यथ नु लगवुन ज़ांह ति ग्रोनुय
 यिमय तॉमीर द्युत सॉनिस फनस छी
 यिवान ओत लूख कॉत्याह दरशनस छी
 कनिव्य् थम्ब डूर्यदार शूबान तंदले
 छे शूबान बारगाह यथ म्वख्तु संदले
 बखुशमुत जुव छु वँथरन रंग पोशन
 सि शिल्पी राज़ु वुछ वुछ ओस तोशन
 गछान मस रॉनियन सुत्य् खेलु कॅर्य कॅर्य
 थवान कॉसिब तिमय अँस्य् नक्श गॅर्य गॅर्य
 वक्त वाती तु योत लागि रेज़ लूकन
 वुछिथ तॉमीर संग हॉरान सपदन
 यि दौरे फन छु तॉमीरन हुंदुय दोर
 छु वक्तन थॉव्यमुत्य् कॉयिम यिमन ज़ोर
 शुहुल राज़ाह स्यठाह तस अँस नरमी
 सु विष्णु भक्त अँसिथ शीव दरमी
 वनोस ऐ दोर वासू गुप्त शूब्यस
 स्यठाह थोद द्युत तसुंद छुय अदबियातस
 सु मशहूरे ज़मान आनंद वरधन
 तँमिस अँलिम दिवान अँस्य् मीठ्य पादन

छे रान्यन मंज़ हसीन बोहदूर द्यद रॉन्य्
 स्व रॉनी कॉशिर्यव पंचाह वॅरी मॉन्य्
 जया पोराह छु शहरा कामराजस
 नखय सुम्बल छु गुल लॉगिथ यि ताजस
 विहारन मंदरन तय मस्जिदन बँन्य्
 अमा खंडर कॅमिस सन यिम दिवान वँन्य्
 वनान क्वटु रॉन्य् ओत येलि छेकरस वॉन्न
 कत्ल सपनेयि अँखुर रँट स्व शाहमॉन्न

★ ★ ★

सँतिम सर्ग

सेक्युल मुलखाह अरब वाराह छु मशहूर
 अँती इसलामकुय नोन द्राव मनशूर
 छि थँव्युमत्यु क्वदरतन बँर्य बँर्य खज़ानय
 अवय तॉबीन छुस सौरुय जहानय
 अरब हॉकिम छि तुरकिस्तान वातान
 फतह कोबुल कँरिथ तिम स्यंद ज़ेनान
 खँलीफा अख तरान हमलस कँशीरे
 गछान नाकाम ललतादतुनि वेरे
 यिवान गज़नी ल्वहर कूटिस छु हमलस
 मगर हॉरिथ गछान नाकाम वापस
 दुबारु योद यिवान हमलस छु गज़नी
 छु फोजस कॉशिरिस निश कँह नु चलनी
 करान ऑखुर हर्श बँर्ती छु तुर्कन
 जँरिथ तस लाल हेरन मँहल खानन
 यिथय पॉठ्य वारु वारय जाय शेरान
 ब-कर्म सूफियां इसलाम वातान
 ब्वटु राजाह गछान मुशरफ ब-इसलाम
 छु बुलबुल शाह अनान युथ कार अंजाम
 प्यवान वॉतिथ कँशीरे ऑलिमे दीन
 छि अखसर शाह तिमन रोज़ान तॉबीन
 अनान तशरीफ योत येलि शाह हमदान
 अँकीदतमंद तिमन क्वरबान सपदान

शहाबुद्दीन ललतादित्यु सॉनी
 करान तॉमीर लक्ष्मी नगर नॉमी
 छु दोरे कुतुबदीन अरफा तु आला
 रछान हँद्यन मुसलमानन सु यकजा

अँचिथ तॉज़ीमु सान मंदरन मँशीदन
 सु खॉरातुक्य् खज़ानय ओस मुन्नरन
 वले दोरे सिकंदर रूद मशहूर
 दपान दिथ ठोस तॉमीरन कोरुन सूर
 किताबन हुंद डलस सोथ खारुनोवुन
 वनान तहज़ीबसुय बुथ नाहवुनोवुन
 खत्म रस्मे स्ती, ज़ार्यन कोरुन दम
 शराब्यन हद कोरुन बा हुक्म महकम
 सपुद ऐलान सुह बट शहरे खासस
 बटाह यिनु बूद गछि नगरस दिहातस
 ब-मुल्के पँज नद अँड्य गँय रवानु
 अँड्यव वॅलिमु पॅरिथ बॅचरोव पानु
 रेशव सूफ्यव रेवायत थॉव कॉयिम
 रुन्नर प्रथ कॉसि कांछुन रूद लॉज़िम
 कुनुय मँज़िल वतन ब्योन ब्योन छु आकार
 वनान अँड्य छिस सगुण, अँड्य छिस निराकार

यिवान शमस इराकी मुल्के कश्मीर
 छु मूसा रॉनु तस हर सातु दरगीर
 करान तबदील मज़हब कुत्य् पँडिथ
 गछान केंह दर ब दर कश्मीर त्रॉविथ
 छि आमृत्य् योर ऑलिम फखरे उलमा
 यिमन मंज़ मीर हमदॉनी छि आला
 खसान मखदूम साँबुन लूख साँरी
 मंगान दसगीर साँबस दस्तगीरी
 बजर अँलिमस छु बख़्शान पानु खॉकी
 छु वथ इरफानुची हावान सरफी
 रेशव मँद्य ग्यान इरफानुक्य् समंदर
 तु सूफ्यव शार वॅन्य् वॅन्य् खॉर्य् अम्बर
 शिवस गँयि लीन लल समसार त्रोवुन

वतस ललु वाखवुय सुत्य नेशुनोवुन
 यि शुन्य ओसुय तँमिस तॉब्या खयालन
 स्यठाह थोद शानु खोरुय तस ज़मानन
 तस्सवुफ शेव दर्मस म्युल कोरुन पूर
 दिलन मंज़ बॉयचारुक बॉगरुन नूर
 बेन्यर तस निश नु केंह सॉरी छि यकसान
 छे बॅड इनसॉनियत बन जान इनसान
 तँमी ग्यानुक तु द्यानुक प्रोव मँज़िल
 तँमिस शक्ती तु वॉनी ऑस हॉसिल

“त्रेयि नैंगि सराह सरी सरस
 अकि नैंगि सरस अर्शस जाय
 हरम्बख कौसर अख सुम सरस
 सति नैंगि सरस शुन्याकार”

“शिव छुय थलि थलि रवज़ान
 मव ज़ान ह्यौद तु मुसलमान
 त्रुक ऐ छुख पान पञ्जान
 स्वय छय साहिबस सुत्य ज़ॉनी ज़ान”
 - लल द्यद

सि सहज़ानंद र्योश रहबर छु सोनुय
 अहिसुक वॉसि मोनुन पर पनोनुय
 तसुंज़ आवाज़ लूकन तर्जमॉनी
 पॅकीरा ऑमिला तस कुस छु सॉनी
 वॅनिथ श्रुक्य कॉशिर्यन हुंद शान खोरुन
 मुहब्बत लोल सार्यन बॉगुरोवुन
 कमालस वोत अदु सुय शेख आलम
 सु मोनुख दीन दर्मुक टोठ संगम

“च्युय दीव दरथस तु गरथस पज़ख
 च्युय दीव क्रंज़न हुंदुय छांफ
 च्युय दीवु ट्यंवु रोसुय वज़ख
 क्याह छुय प्वन्य तु क्याह छुय पाफ

अँकिस मॉलिस माजि हुंघन
 तिमन दुय त्रॉविथ तु क्याय
 मुसलमानन क्यो हेंघन
 कर बंदन तोशि ख्वदाय”
 - शेखुल आलम

शहन मंज़ शहनशाह बडशाह छु नॉमी
 तमी गुलि मीठि दिच असि शादमॉनी
 तुलुन दस ताज़ु तॉमीरन ब-जलदी
 न्यस्फ शँतिलिस करान रूद पादशॉही
 फिरिथ शाह क्वल अँनिन मंज़ शीशु खानस
 स्व स्वर्गुच त्रेश छय चावान जहानस
 करालस चकदरस ता लार अनहार
 सु बडशाह मांछ येमि संज़ कथ ति गुफतार
 रवादॉरी मुहब्बथ बॉयचारा
 व्यतस्ताये बजर छुनु कांह शुमारा
 अँनिन मंज़ एशिया कॉसिब तु फनकार
 गलाह अरज़ान, नॅव्य नॅव्य कार, बापार
 फिरिन दर फारसी पतु शास्त्र सॉरी
 दिचुन अँलिमस तु अदबस पेश अनवॉरी
 बसोवुन जॉनुगीरो जॉनु पोराह
 चॅलिथ गॉमुत्य् अँनिन वापस ति वाराह
 प्यवान येलि जून डब छम याद प्रॉनी
 खयालन मंज़ वुडान छुस आसमॉनी

रवक पांज़ाह छि प्रथ पोरस सजॉविथ
 रंगा रंग शीशु मँहला थोद छु खॉरिथ
 अवेज़ान तालवन छिस म्वख्तु जालार
 खुत्म बँदी करान छस तारकन हार
 से मंज़स जून हावान रोय ताबान
 येम्युक गाय जायि जाये साफ वातान
 स्वनय लाँके बिना दर-डल छु कोरमुत
 कलाबूतुक फ्यरन र्वपु लाँकि जोरमुत
 वँसी व्वलरस त्वले मंज़ जॉनु लंका
 जँमीनस प्यठ बँसिथ आकाँश्य् स्वर्गा

संगरमाल:

फोलिथ आमुञ्छ छि बादाम वॉर छावव
 ब्रुंज़िस सातस असन खंगालु त्रावव
 समावारन अंदर कँहवा जरी वुछ
 नञ्चान सोंतुच पॅरी वुछ हमसॅरी वुछ
 अँती नागर नगर ओस शहरे अकबर
 अनान ऑस्य् पानु नेबरिम राजु अक्सर
 कलाया खॉरमुञ्छ महकम छि वुछतन
 बहारन रॉछ थँव मा वारु वक्तन
 अंदर अञ्चनस छे अथ दरवाज़ु जूर्या
 यिमन डेड्यन अञ्चान फीलि शहनशाह
 छु मंदोर्यन शुबान ख्वशवुन व्वलासय
 मनाह फोजस गछुन दर शहर खासय

दुरान्यन नाव ह्योन दुशवार दुशवार
 वँरुख रज़ अँह्य रंजन काँशिर्य वँरिख खार
 सिकव येलि होव, बुथि लँग्य लूख दारस
 ह्यवान तिम बाज गँयि वावस तु कावस

★ ★ ★

अठ्युम सर्ग

लर्यन जायन छि अँद्य अँद्य खाम देवार
 मँशिथ बासान गॉमुत्य् प्रॉन्य् अनहार
 छु ख्योन मंज़ कतरि बानन तंग दँस्ती
 करान जाँबिर तु हाँकिम रोज़ तलबी
 बन्योमुत छुम वनुन गुदरुन मे बावुन
 गमन हुंज़ि अँथरि च़ोटमुत म्योन यावुन
 गहे तुल च़ेरु ख्यथ ओस दूह कटावुन
 गहे यॉजाह तु वाठाह दम कटावुन
 वतन गुलशन, कुल्यन फल कस सना कित्य्
 गुटन गामन छे ग्वरबत ज़ाल वँहरिथ
 अदालँच़ वानुनय ह्योन द्युन छु जाँरी
 छु कति पुरखाश, सार्यन बे करॉरी
 वुछिथ थँज़ शेर गँड्य व्यथ रूज़ सोचान
 ग्वलॉमी हुँद्य च़ुकृत्य् असि क्याज़ि ज़ालान
 पँरी महलस नच़ान पेठ्य कालु ओबराह
 पथस हाँरिथ बिहिथ कोशुर छु गोबराह
 फिज़ा खामोश पोज़ तूफान व्वथुवुन
 स्यठाह यँच़ काँल्य् गटि आखताबु खसुवुन
 पथर त्रावुन्य् छि ताजो तख्त यकदम
 तवय द्रामुत्य् छि काँशिर्य् होश बरहम
 बला वीरा असी मंज़ वोथ द्युतुन नाद
 बन्यव सुय राहनुमा, होकुमस कोरुन वाद
 च़ववापासे छु मुल्कस मंज़ तलातुम
 फरंग्यन सुत्य् लोगमुत बोड तसादुम
 कनन मंज़ नारु साँरी ग्रायि मारान
 छे ख्वशहाँली पकान व्वन्य् पूर्य् त्रावान
 मगर चालाक हाँकिम वक्ति र्वखसथ

छु अर्जथ सॉन्य नहनाँविथ च़लान पथ
छलन मंज़ बाँगरान हिंदोस्तानस
लितुर वायान सॉनिस दोस्तानस

गवॉही अथ लछन हुंद कत्ल गारत
छ्वकन प्रान्यन छु वुनि पेडान असि रथ
रिवुन पंजाबकुय रुम रुम छु काँपान
दिल बंगाल अँदरी खून हारान
कबाल्यव हमलु कोर गँय मारु काँत्याह
विजॉरी कॅर तिमव वुछहस तमाशाह
मुल्क ज़ख्मी, मगर अँस्य् शीरो शकर
र्यवायत काँशिर्यव रँछुर्य बराबर
नव्यन आशन ग्यवान रूद सोन महजूर
तँमिस ऑस काँशिर्यन हुंज़ माय बरपूर
छु तुलमुत शौख तहज़ीबस असी व्यूर
गुल उर्दू तु हँदी फोल्य येती पूर
हिमाला सानि वहदतुची निशाँनी
व्यतस्ता सोन जान्यर छय थ्यकाँनी
छु काँली दास अज़मतुकुय निगहबान
कबीरौ चिस्ती व गॉलिब गज़लख्वान
पकव यकजा तु तैल्य मँज़िल करव सर
छे आसान फिरक बंदी यछ तु बदतर

पकान अँस्य् रूद्य कुल दुनिया छु ज़ानान
मगर दूहदिश दूलाबन मंज़ परेशान
फिरान अँस्य् चॉठ दँरियावन बराबर
च़टान बालन जिगर, सँद्रन करान सर
व्योखुत तफरीक मुलकस क्याज़ि वोथमुत
मोकुर गासाह च़ववापाँरी छु खोतमुत
वुडव मोठ शोक क्यन जानावरन हय

गछान छुनु क्याज़ि तदबीरन स्यज़र हय
 खबर असि आँस गँयि आज़ाद साँरी
 गुलामी हुँद्य बलन व्वन्य् दौद्य साँरी
 अमा तरज़े हुकूमत क्याज़ि प्रोनय
 अँदुर्य किन्य् छोद्य नेबुर्य क्याह नुंदु बोनुय
 अगर ज़र छुय तु तेलि मुश्किल गछी हल
 पकान काकज हवा बर-ज़ोरे बोतल
 छु आसन वॉल्य् सुंद प्रथ कांह गुलामा
 चे मा खॉली अथव नेरान काँमाह
 अड्यन तालव च्रँटिथ वसि र्वपयि रूदा
 अड्यन माँसुम छि केशान नफ्सु दोदा
 अगर मनसिफ तु हाँकिम पोक सतस पथ
 अँदुर्य तस मारु गछनुक रोज़ि हाँबथ
 सियासतु क्यन दुकानन फंद बाँजी
 छि हँथ्य् यारन ह्यवान अज़ काँम साँरी
 द्युतुख नारु तु मुल्कस छुय लगान नार
 फकत वोटुक च्ववापाँरी छु बापार
 वुछव अखबार, खोफुक्य् सायि तेलन
 पँरिथ वँहशथ तु हाँराँनी छि मेलन
 गछ्यख यी ख्वश तु ती छी आपुरावान
 बेमारस ज़हरुची शर्बत छि चावान
 लिखॉर्या नेरि योद, ननि वानु करि कथ
 जुवय गँछनस तँमिस छनु दाँन्य् फुर्सथ
 अवय दूह दूह कडुन मुस्किल छु बासान
 कुहुन आँद पोख तु तमिचे छायि लारान
 छु डोलमुत ज़िंदुगी मीज़ान सोरुय
 फिरिथ गाँमुत्य् छि वापस साँन्य् ज़ोरुय
 छु आमुत जेरु लूकन वेह छि च़ापान
 मँशिथ गाँमुच़ तिमन पनुनी छि पहचान

★ ★ ★

नँविम सर्ग

ह्म्यव येलि चित्र वावस ज़ोर सौरुय
 संगे माले अमारन नाद लोयुय
 दिचन डालाह तु तेंताल्यन मोलुन नूर
 रंगस मंज़ पान नोवुन पानु बरपूर
 कवस ओस बालु दामुन्य नव बहारा
 अँछव सुत्य होवनस दूरी इशारा
 नचुन ह्योत पोंपर्यव गँय आरु सेतार
 कलस दस्तार गँड्य गँड्य आयि विर वार
 छि शीनस तल कुलिम बुबरायि फोल्यामुत्य
 तिथय गिलि टूरिवुय सब्ज़ार वँल्यमुत्य
 यँबुरज़ल ज़ानि कवु ऑस बांबरेमुच
 ब्रँडिस पतु आयि शायद तम्बुलेमुच
 गिंदुन ह्योत विरि केम्यव अदु टेकु बटन्यव
 वुडुर गोशन छु आमुत ताज़ु योवन
 छु हवहस न्यॉव्य पोशव मुश्क मोलमुत
 छु आलम सोर बासान मायि वोलमुत
 चुनुन्य कुल्य दूरि येलि पर्तव छि त्रावान
 चे दर्शन दारि विगने माँज़ छावान
 छि अँनिमुत्य सालु सोंतन जानुवर कुत्य
 वँतिज अँन्य पोशिनूलन साज़ुगर सुत्य
 सतुत्य आमुत्य जँमीनस साद वुछने
 छि द्रामुच कुल्य ददुर कुल्य ज़ाल तछने
 चुने हांगर खँसिथ फ्रस्तन वुफॉनी
 छे कुकिलव ताज़ु शेछ अँनिमुच ज़बॉनी
 लंजन प्यठ बुलबुलव कम नगमु वुज़नॉव्य
 हवा आव मुश्कि फँत्य ह्यथ लॉव्य तय सॉव्य
 सब्ज़ गासस छु शायद ओबुर छोकमुत

छु अख अख गासु कुल नवि थेरि खोतमुत
 क्वलन नागन ज्वयन अमृथ हर्योमुत
 शिवस अतरे कलश वॅस्य मा छु प्योमुत
 खहव वॅजिमुन्न छि पानस सॅनिजु च्चादर
 गुलालव खॉर्यमुत्य् लालन छि अम्बर
 फुलय पॅरियाह छि द्रामुन्न तन ब्रहन
 यिहय शोवय पकान सीनु ब सीनु
 छि आमृत्य् चूठ्य कुल्य् ह्यथ पोशि दस्तय
 फोलिथ बादाम आमृत्य् आस्तु आस्तय
 डलन पम्पोशि कॉलीना छु त्राँविथ
 ख्यलन रातास छु थोवमुत म्वख्तु छॉविथ
 नबस थॅव्य् ऑनु साज़व ऑनु गॅर्य गॅर्य
 यिमन मंज़ सासु बॅद्य तसवीर जॅर्य जॅर्य
 च्यतस मंज़र छि तेलान बे खबर कुत्य्
 यि दौलथ ह्यथ छि गॉमुत्य् बहर वर कुत्य्
 दिवय सौंतुच लगान येलि पूर जस्तय
 गरन थावान सॅरी दर छि बस्तय
 मशान हूरन छु पनुनुय हुस्नुकुय ब्रम
 वुछिथ प्रथ तरफु सौंतुक शोख आलम
 खबर तेलेयि गुलशन आयि फोल्स्य फोल्स्य
 यिवान सॉलॉन्स्य ननु वॉरी छि च्रुल्य् च्रुल्य्
 गुलाबन कॉशिर्यन ख्वशबोय वखरय
 यि क्वदरथ सानि बापथ दीन तय दय
 सिराह छुय मूसिमन मंज़ सोंथ सोनुय
 यि कोशुर स्वर्ग छुय चोनुय तु म्योनुय
 बहारस मस वुछिथ ग्रशमन सखर कॅर
 संगर व्वशलेयि बालव ब्रोंह नज़र कॅर
 खहन रीशिम छु वथरिथ जायि जाये
 लुकव ह्योतमुत छु नीरिथ युन कमाये
 डलस मंज़ मसवलव दिन्न यावुनस शूब

शिकार्यव गँहनु लॉगिथ थोव असि लूब
 असुन ह्योत ज़िंदुगॉनी होटलन मंज़
 हवस बोटव छु कोरमुत शादि हुंद संज़
 निशातुक्य् शालुमॉरुक्य् नाज़ बदलय
 निगीनुक्य् पोशिवुन्य् अंदाज़ बदलय
 छु शॉही चश्मु सर आबे हयातस
 छि लारान तेल बल शब बरनि रातस
 हु चश्मे साहिबी नाबद वुज़ान छुस
 बिहिथ लोब कुन मगर दिल क्याह फवलान छुस

दखिन्य् वावाह छु लोत पांच्रॉल्य् आमुत
 कॅरिथ गथ वीर नागस डूर्य् द्रामुत
 हवा माला फिरान बदनस छु शेहजार
 दज़ान मॉदान ग्रशमस मंज़ तुलुव नार
 क्वकर नागस छु लोगमुत वाज़ वाना
 ख्यवान सालाह चवान त्रेशाह छि दाना
 मन्नर फम्वारनुय दर बाग अछिवल
 छि हूरन सुत्य् लारन कुत्य् शोकल
 पहलगामस छु आमुत लॉन्य् यावुन
 गछुन दूह पॉशि पज़िहे सादु माल्युन
 बदन शेहलावुने सॉलॉन्य् आमुत्य्
 छि यार्यन दर दिली हुंद्य नगमु ज़ामुत्य्
 व्वथान लोलाबु रंगन हुंद्य मलर वुछ
 वुछुन योद छुय तु गछ आबे व्वलर वुछ
 चे मरगन मंज़ सरस गुलमर्ग सॉनी
 स्वनय मरगे वुछुन आलव दिवॉनी

गछान दरगाहे आला लूख सॉरी
 करान हाजत मंदन सुय पानु यॉरी
 प्रज़लवुन अक्स मीनारे मुन्नवर

वुछिथ प्रथ कांह गछान रुज्जिथ छु शशदर
 चे नूरुच बारगाह मंज जून गाशस
 छि खौरिथ म्वख्तु अम्बर ग्रंद नु राशस
 छु असलुक गाश फोलमुत शुचि शाये
 थंजुय दरगाह यि लूकन बागि आये
 अकीदतमंद छि ओत हर सातु वातान
 दरूदन मंज छि रुत दीदार प्रावान
 कदम वॅल्य तुल छि लॅजमुन्न चारु ब्रसवार
 अलमदारस मंगव स्वख वक करव यार
 अनव डॉल्याह अथन मंज चारु कांगुर
 पकान लुख सासु बॅद्य काँसी नु बांबुर

बखृत्य चॅक्रीश्वरस पूजायि वातान
 करान अरपन छि दीवी प्रान तय पान
 दया दीवी करान बॅखत्यन छु पालान
 चनस मोनस छे पानय वर्गु वालान
 गछान प्रथ अश्टमी तुलमुल रवानु
 प्रखुट दीवी बिहिथ तति पॉन्य पानु
 हमान गरमी तु ओश हारान वॅहराथ
 लगान छुनु सानि वारे कोहनु बरसाथ
 गोबुर स्दरव पॅकिथ बालन छु छारान
 करान मॉदान सॅर्य रूदाह छु वालान
 छि मा अथ मूसिमस काँशिर्य स्यठाह लॉर्य
 छि ना अँस्य ख्वश हवावुक्य प्रॉन्य बापॉर्य
 गहे वॅहराथ नारो नार सपदान
 डुविथ फसलन निवान, खूनखार सोपदान
 सुमन कॅदलन कुल्यन ठॅल्य ठॅल्य छि वालानब
 अँचिथ नम्बलन अंदर जु्रियाथ गालान
 तवय वॅहरात असि छनु नावि वालान
 यि मूसिम ज्यादु कालस छिन नु पालान

जॅरी मस्तस जॅरिथ स्वन तालि ताले
 हरुद बरकत छु शेरान मालि माले
 हैल्यन छ्वन्य् छ्वन्य करान सॉलस छु नेरान
 दजन डोर्यन तु नारन वारु फेरान
 म्यवन मेछर छु खारान वारु वारय
 छॅकिथ म्वहरन करान छुय द्यारु कारय
 छु रोटमुत बोनि बागव केसरी रंग
 ग्वसान्यव दोनि लॉगिथ ज़ाल्यमुत्य् कंग
 प्रज़लवुन्य् बालु थंग्यन ओबुरु दसतार
 खलन मंज़ गुंगु रावान लूकु अशआर
 गिंदुन ह्योत काचु ज़ूने आसमानस
 फवलान क्वंगु पोश वुछमय तापुदानस
 कॅरिथ ज़रबाफसुय थॅव्यमुत्य् छि अंबार
 वतन आमुत छु पानय पोशि गुफतार
 अमुर्य् चूँठचन थवान छी डालि कॅर्य कॅर्य
 स्वरख त्रेलन निवान छी पेटि बॅर्य बॅर्य
 पछे वादन ओबुरु दिथ खुमु रोज़ान
 खटान अखताबु योरुक कॅह नु बोज़ान
 थवान त्रोपरिथ छि सॉरी दारि तय बर
 वछस कांगुर रॅटिथ त्रावान छी लर
 मतान बहराम गोल हँद्रेर फेरान
 वतन प्यठ शीनु मोहनिय्व् जाय शेरान
 वसान थोस्य् बारु येलि आसमान रावान
 सहर फोलिथुय छि लुख नवशीन खारान
 पशन शीनुक्य् छु खरान बॉर खानय
 लॅगिथ चोकस गछान सॉरी छि बानय
 वॅजस वालान शिशुर छुय लोरि गॅर्य गॅर्य
 सरन आरन थवान छुय शीशु कॅर्य कॅर्य
 करान बॅस्ती छि वन सुह शाल हापथ

छि शीनस लूख छारान रॉवमुच्च वथ
 शिशुर तीज्जिथ छु सडकन मोहरु द्यावान
 जॅमीनुक शीन कुल्य तेहर्यन छु खारान
 फिह्यव सुत्य् शीन येलि पॅथरिस छि वालान
 पकन वाल्यन छि अँडिजन तुर खारान
 अड्यन शब देग प्रारान ताजु ताजय
 ख्यवान कॅह लूख रॅन्य् रॅन्य् गाडु माजय
 बिहिथ प्यठ दारि खेयतव डल मसाला
 ख्यवान ग्वशताबु रिस्ता लूख आला
 नदुर्य यखने छु मुशकुन्य् दार नेरान
 हवगाडन सुत्य् कानुल्य् हाख शेरान
 खेच्चे मावस स्यठाह पथ कालुची रीथ
 अड्यन गाडा बता प्रॉनी छि परतीथ
 गलान येलि शीन अँदरी वारु वारय
 खसुन बालन चलुन तथ छुस न चारय

★ ★ ★

नगु

ज़ख्मन जिगरस छिठ छम छॉविथ
 वनु कस क्याह कोताह ह्यकु बॉविथ
 पनु पोंपर वति वति शेहलॉविथ
 सोंतस कुस कतरॉविथ गव

वेंतिजन चश्मन शींक्या त्रॉविथ
 शोरु अंबारस हॉविथ तुज
 आगर सॉरी पतु ह्वखुनॉविथ
 सोंतस कुस कतरॉविथ गव

पोशे मर्गन हालव त्रॉविथ
 संगर मालस जॉलिथ नार
 वेंथरस वेंथरस बुथ पुचुनॉविथ
 सोंतस कुस कतरॉविथ गव

सहरावस मंज़ अंद कुन त्रॉविथ
 गर वाल्यन मंदु छॉविथ गव
 दारस दारस हाँकल थॉविथ
 सोंतस कुस कतरॉविथ गव

मँकरिस मालस लरि लरि छॉविथ
 अतरे वानन त्रॉविथ सूर
 प्रान्यन छ्वकुनुय म्वख मुन्नरॉविथ
 सोंतस कुस कतरॉविथ गव

सोंतो व्वथ ख्वशब्बय छँकरॉविथ
शिशरस व्वन्य् कति रोज़न ज़ोर
केंछा कर केंछा दितु हॉविथ
सोंतस कुस कतरॉविथ गव

★ ★ ★

नज़्म

लफ़्ज़ फुटरॉविम गॅरिम

प्रानि गरतुक्य लफ़्ज़ केह बाज़र कॅडिम
 वानु वाल्यव दोप लगन कथ यिम बकार
 मानि बदल्यव , म्वल वोथुख
 माल केह बदलुय च्च अन

वक्तुचन यमरॉज़्ज्य सडकन
 प्यठ असान ख्वशवुन्य सलीब
 चोकु मंदोर्यन वुछम चश्मय फिरिथ
 काकजी काँटन गॅमुत्य दाना अलूंद

ब्वन दितिम दॉरिथ फेक्यव पेठ्य
 कुत्य शोरेमुत्य व्यताल
 वुलटु बुथ्य ह्यथ
 यिम नच्चान फलवॉय ऑस्य

शोकु डबि प्यठ दम द्युतुम
 समयिकिस सोथरिस वुछुम
 अख हूल हालय अँदरुखल
 अँथ्य अँदर कनवान हिश अँदरी गॅयम
 ऑस ख्वसु बरख़ान फरहथ
 यथ मनस

जानिरुक्य वुल्यदार दामन
 शूबि हुंद्य केह तापु टेक्य
 इनसान सेज़रुक्य ऑनु पॅट्य
 अन्यमस सवॉली

गुल्य् गँडिथ वोनुमस
 दितम तिथ्य् शब्द केंह
 पुर असर आसन करामाथाह करन
 मायि हुंघ कोसर अतन
 डालि ह्यथ प्रेमुक नॅवीद
 गाशु हँत्य् नाबुघ सहर
 खेलु करवुन्य् ज़ून पछ
 मुश्क हँत्य् स्वरमॉल्य् शाम
 पोशि नूलुन्य् वुफ तुलिथ
 दरती हुंदिस लेदुरिस बुथिस
 लागन अबोस
 नूर आगर हर्फु चेहरन
 बरकतुक्य् दफतर वलन
 दँद्यमुत्यन ज़ेहनन करन
 मेछर अता
 गाशिनावन
 अक्लि कोचन हुंघ वुनिब्य्

लफज़ फु;रॉविम गॅरिम
 खँहरँन्य् वॅडिम
 दोपुमख रँटिव नक्दि हयात
 काँदु मंज़ु नीरिव न्यबर
 अख पुरखुट कामोस ह्यथ
 युथ नु वुकरिस सरफो नहवस
 प्यठ वॅरिव व्वन्य् एतिबार

★ ★ ★

नज़्म

नाँग्य् रायो कोत गछ्ख

नाँग्य् रायो कोत गछ्ख
 कति चोन पाय
 ज़ाथ वुछनय प्यठ बुथिस
 हुमनय यि काय
 आख फीरिथ आँथु रोस सहरावनुय
 वाँति रोस सँद्रन, सन्यन दँरियावनुय
 गर्दि बुज़्य् गॉमुच्च छे वथ
 ठँहराव कर
 शोकु पम्पोश अंदर ह्यनु आख वाय
 सौंतु रंग गय जल शवू ज़द
 तापु टेक्य् वनि आय मा
 कामु दीवस बस्म गव
 नामु कस लेखान छुख
 राँछ कुस शबनँम्य् गँचन
 नाज़न खँरीदारुय नु कांह
 बँस्तियन लोग शाफ
 बुस्तानन ह्वखय
 द्वह कडुन छुय कोह
 हना बेदार गछ्
 युथ नु शहरस मंज़ अच़ख
 बे-फ़ोक ग्यवान
 मुठ्य फँलिस अनुनय कुनिथ
 छलकार्य् जोदल बाँज़्यगर
 ज़हरु व्यथ अज़ यारबल क्याह छुय करुन
 बाँल्य् खसुवुन
 युथ नु कांह लायी च़े तीर

वुछ च्छु खाबन लाय फॅटमुच्च
त्राव हावस शोछ वनय
ज़ाथ परखावुन्य् छु वुनि जॉरी मत्यो
बोनि सब्ज़ारस अंदर तलवार बाँज़ी

शोरु बॅरितिस आंगुनस
ह्यसु पख साँ हे
रेश्य वारि अज़ लॅजमुच्च छे बूल्य्
नैदरि वॅछ ही माल
नाॅग्य राय च्छोल
छुय अगर दूह दूह कडुन
चोमराव पान
कॅड्य दूफन कुल्य् माँछ रादन तल अँच्चिथ
सम्बलाव तन, गॅखराव पान
छी गरड बालन नच्चान
त्रौब्ब्य दिनय, यिनु रथ चनय
वालु वाशन लागुनय
म्वकलख नु ज़ांह

★ ★ ★

नज़्म

वनव मंज़ु विगनि तोप कॉसिथ कजख
सब्ज़ार व्वहलॉविख
पॅरिस्तानन चॅटिख शाह
रूदु जरि ज़ाजख
मनस प्रयिवुन्य् छँजल रॉयिल
पथर ठॉसिख, मुलय गॉलिख
हयातुक्य् रहमतुक्य् आगर
सरे शामय गरन सॉरिख

★ ★ ★

नज़्म

जानुवारा आसु हा

जानुवारा अख यिवान
 अँद्य पँख्य नचान बूल्या करान
 ग्रश्मु क्रायन मंज फेरान शेहजार ह्यू
 रॉत्य् रातस बूत्य् तँम्य् सुंज
 दँद्यमुतिस म्यॉनिस वजूदस
 रूदु दरशुन ह्यू करान

मीठ लयम, औद पोख बदल
 नारु दम मोतुन
 च़ालि कोताह अँहरुनेमुच़ ज़िंदुगी
 हालि हॉरान कुद्य ह्यू
 दफतरा वनुनस मगर खामोश लब

काश बु ति अख जानावार आसु हा
 माशि मॉरिथ नेरु हा
 तावनुनि बाज़ॉर्य् च़ूरी शी वँरिथ
 दूर आकाशस अंदर वुडवा वँरिथ
 बालु थँगिस प्यठ बे फ़ोक व्वशला वँडिथ

नागु त्रेशा चथ
 स्वंदर रेश्य वारि मंज
 सडकनुय हुंद खोफ खामोशी वुछिथ
 तेहरि तेहरिय वुफ तुलिथ
 पनुने लरे प्यठ कन दरे
 अँक्य् सुय गरे करुहा करार

वाँसि पॅक्य पॅक्य युस नु कुन वोतुय
 तॅमिस कित्य जिंदुगी हुंघ खाब
 लॅर जाय, आशन हुंघ सराब
 वेंचन जिह्यन हुंद कांह अराम
 छुय त्युथुय युथ शेलि तच्चि
 वॅहराँच्च रूदुक आव आव
 युस नु जांह पूरय गछान

म्यॉन्य कोल्य चान्यन अतन हुंज त्रेश
 कॅम् थफ दिथ नियम
 सर्व कुलि म्यान्यो म वद
 थव काँर थॅज

दारि म्याने पॅट्य यलय
 आलि रोस कॅतिजा वुछान
 हाक वारे स्वय छे तेलेमुच्च स्यठाह
 आसगनुच अख अख द्रमन कानुज रिवान

बरनि पॅट्य आदुम्य अँछन प्रारान हिव्य
 चुर्य ग्युशुय मोठमुत छु फिज़हस
 जानुवर हैबुंगु हिव्य
 चोकि अँदरिम ख्वश यिवुन्य कथ बाथ
 'स्युन क्याह रोनुवु अज़'
 मोसमन हुंद रुत आसुन
 यथ नु कांह मज़हब छु नाव
 पॅरियि वनवुन, कुकिलि गू गू
 आबु जोयन हुंद आसुन
 मानि अथ बदल्योव, वक्तन तुल बुन्युल

काश कांह सादाह र्योशाह

बेयि पॉदु गछिहे
क्रॉर्य बलुहन, यथ ड्यकस हीमालु किस

जानु वारा, गछु च्ने लॅगिनय आय
संगीतस हॅटिस
बोलि चाने जाविदॉनी ऑसिनय
जानु वारा तेज़ कर बूल्या पनुन्य
छुस गोमुत अज़ गीर, च्ने ति कोताह वनय
अख सवाबा योद करख
यिम म्यॉन्य व्वश म्यॉन्य व्यदाख
दूर असमानस अंदर वाहरख च्चोपोर

★ ★ ★

नज़्म

व्योखुत सोपुन

खवशवुनि शंगरॅफ्य अथु!
 आकार रॅटिथ मनु मंज़लिस म्यॉनिस
 जुव बख्शुय वॅकम् कलाकारन
 नम गॅरिथ चॅरिथ
 रच्नु फॉल्स्य
 कस ताम शोकलि हुद्य
 नक्श
 कस तामथ ऑही करवुनि
 दीवी हुंदि अंगूर्य अथुक्य
 कस ताम माहरेनि हुंद्य
 माँज़ि बॅरिथ गुल्स्य
 अथु
 कस ताम दिवता सुंद्य
 युस गोमुत रूज़िथ
 द्यानस मंज़
 नतु गौतम बुद्ध
 अनुग्रह मुद्रा दॉरिथ
 संगरन खसुवुन्स्य
 कज़ाक तीराह
 तेज़ पनुन्स्य नम खम्बर्यन ठासान
 थनु प्यवुवुन माँसुम
 म्वछि वॅटिथुय
 चख लॉयिथ
 वुज़वान लोव वजूद
 म्वछि मंज़ छुस
 कुस ताम राज़ गुपिथ

सोपनाह ज्यूठ
जिंदुगी म्बखसर बोज़
छुय मरुनुय
यथ हुश्याँरी बस

ख्वशवुनि शंगरफ्य अथु
छुख नारस्थानुक
प्रोन नमूनाह
छ्यनु गोमुत
शाहकार मुरन्न निश
शीरिथ ओसुख ताकस म्यॉनिस
वक्तन सोरुय च्रॉपिथ थोव
गरु म्योन
नम चॉन्य्
सोरुय सोपनाह
ओस व्योखुत
★ ★ ★

पेयि ना वुनलु वतस प्रागाश

म्वछि मूरिथ चोल
 हन हन टकरिथ
 प्रोन वॅरी
 परदेसस मंज़
 ज़नतु कुनिथ गव म्योन वजूद
 छलु छलु म्योनुय
 दोल कतरोवुन
 असनस बसनस लॉजिन श्राख
 तॉरीखी कथ शहरस म्यॉनिस
 बुरबॉदी हुंद नाल वोलुन
 गामन ज़ान तिकु तार कोरुन

नस चॅट आयि
 तु शाहमथ वॅहरुन
 कुत्यन माँज़ गुल्यन गव फान
 खानु वुजॉरी कुत्यन लूकन
 बागि लैछिन
 कुत्यन मोसूमन हुंद गुलशन
 डूठ्य कोरुन
 कुत्यन ठॉसिन बदनस किल्य
 कुत्यन हुंद असमथ लूटोवुन
 कुत्यन सीनन गव बिर्ययान
 कुचन मंदोरन लोग नार
 मँहलन पोर्यन गव समहार
 कुत्यन आल्यन साँपुन नाश

सोरुय मौर्य मंद्युत दुह्य बुज्य
रतु सौर्य गव पाताल
तु त्रहरिथ वोथ आकाश

कुनि किन्त्य यियि ना वावु रिगाह
सौतुच ख्वशवुन्य
चाकन करि ना कांछा वाठ
हावय कौत्याह छ्वख हे बायो
खसि कर म्यान्यन ज़ख्मन अंग

बामन यिन ना कुनि किन्त्य नीरिथ
पामन लगी ना कुनि किन्त्य अंद
फुलयाह बरजस्तय बागन हुंज
करि ना आलव तैलिक्य पौठ्य
बालस कुन अँछ दरु छम लँजमुत्र
पेयि ना वुनलि वतन प्रागाश

★ ★ ★

नज़्म

सिर छुय सिरुय
 क्वसु वखनय करु सिरसॉव्य कथन
 अख अख च्यूह
 कोहिस्तानन हुंज़ मंज़ुल्य गथ
 अख अख पल - वॅर्य हाँकल
 च़लुवुनि समसारुच व्वसु द्रवसु
 हवुहस मंज़ पनु दाव
 यथ प्यठ खुर्य लद वथ छि पकान
 अज़ली वक
 ठाह ठाह वॅर्य वॅर्य च़ूरि असान

जोदथ पोशन हुंज़ मुश्कावुन रंग
 च़कि दफ हरदस लायुन नाद सुली
 अँक्य सुंद मँशारावुन
 शींकिया च़ापुन बेयि सुंदि बापथ
 रातुच वॉनॉकी गँयि पानय
 सुबहुच ब्रांथ
 सिर छु सिरुय
 क्वसु वखनय करु सिरसॉव्य कथन

★ ★ ★

शीन

चित्रकारा
 राँत्य रातस
 गव तख्खयुलु क्यव पॅरिस्तानव अपोर
 बस, कुनुय रंगाह छोकुन
 वोहरुन तु शाहकार गोरुन
 वॅछ नबस आकाँश्य गंगा
 पोस बोरुन मालन
 वॅरिन म्वख्तस अम्बर
 असनि लोग आलम
 अँकिस अँनिस
 वॅरिथ ठाह ठाह
 नन्नान गव शव
 कोरुन छोट ओबरु वरशुन
 हरम्वखस
 अँन्य गँडिथ
 द्दु क्वल
 अमा वॅम्य् मायि मति
 शिठरिथ खॉर्यनस
 नाबुद्य वॅदुल
 साल कोर बुतराँन्न
 छँत्य कोतर, नबुक्य् तारख
 चँसिथ आमृत्य् च्वपोर
 पोशि नूलव ह्योत ग्यवुन
 पारुद्य मुकाम
 फन तु फनकारा
 गँछिथ यघजाह
 नँवुय वॅहवट रँटिथ
 वीगिस खसान

★ ★ ★

नज़्म

अँहवथ ह्यथ लफज़न हुंज़ आस
अँगु क्वंडस मंज़ ज़ोलुम पान
अथि फोल मनु वुसजारुच अरज़थ
क्वछि मंज़ ह्यथ समयिक्य तूफान

मनु किस सँदरस अज़ली बावथ
गोशन हुंज़ तनहॉई टॉठ
रोशन गछि अनि गटि मंज़ मँज़िल
मूलन लागि बेयि लोव जहार

अृनिस कथु यिन, खाल गछन नँन्य
नारस मंज़ आसि सोर जहान
शोकस अदु यियि अदबुच दीवी
गतु रेन्य करि सिरियस सुत्य मान

★ ★ ★

नज़्म

वावु ग्राया आयि यादन ज़ीर लॅज
 पोशि कुज हवसन हुंजुय यॅच्च कॉल्य् फोज
 लोलु बदनस वलनि लोग यावुन हरीर
 तापुलिस मंज़ व्वलसनस आव ज़महरीर
 ज़ीर लॅज जज़बन तु मन गव सीम आब
 दूरि फोल्य् सेकल्यन अंदर शोकुक्य् गुलाब
 पर्दु वॅथ्य् सोचस तु चॅल्य् आकॉश्य तीर
 आरु जोयन मंज़ रवान गॅयि आबु सीर
 लफज़ हॉरिथ बीठ्य कस तां दीद मान
 छुय च्यतुक पर्तव करुन मुश्किल बयान
 बोवमस हे वुठ हना कुमलाव सॉ
 प्रॉन्य् पॉठी कांह गज़्ल म्वलुनाव सॉ
 चश्मु जामुन्य् आसु, बुथ ओस ताबदार
 ज़िंदुगी कति ओस पुचनॉविथ करार
 ऑस्य् रोयस प्यठ लेखिथ तस हॉरिसात
 आलमाह बदलय तु हॉरिथ म्यान्य् ज़ात
 ऑस स्वंजल आसमानस दर हिकाब
 इज़तराबो, इज़तराबो, इज़तराब

★ ★ ★

नज़्म

नबु ग्रन्थ ह्यू गव
 गगराय कॅरुन
 मॅत्य हारन थॅव्य
 हॅथ्यार पथर
 छॅत्य बारव खॅत्य
 वॉनाख वनन
 रूदु रॉटाह पॅच
 वॅछ तीर्य खेलिस
 डुबु डास कॅरिथ
 सेकि डाफुर्य पॅच
 नुनु नाव ति फॅट
 हुन्य मॅशदि छु
 जिन वोल्योमुत सख
 सिन्य मुहिमि छि द्रामुन्न क्वसुतामथ
 सतु ज़ाव शुरिस
 म्वनि मीठ्य करान
 गछि ओबुरस चाह
 अखताबु वुन्य दियि
 गोंछन वर
 यथ मर्गि अंदर
 ज्योन मरुन ह्युवुय
 दिवदारव बेयि कोड जिस्मस काड
 र्वनि लॉगिथ संगर
 वनुवान द्राय

★ ★ ★

गीत

तुल सनुवुन्य् सनुवुन्य् लोलु कथाह
 यावन मॅच्य् यावुन रोज़ान छा
 येलि नार गंडी दिलचन तारन
 तेलि रँख क्याह, मँशरावख क्याह
 योद वँहमन हुंघ ज़ोलानु गरख
 कमि तारु तरख परखावख क्याह
 येलि सहरावन रुदु श्रानि वसन
 तेलि बोनि बुलन वाहरावख क्याह
 येलि लोलु वनव मंजु विगिनि चलन
 तेलि वीगिस प्यठ वनुनावख क्याह
 अनहार वुछख मजबूरुन्य् येल्य्
 तेल्य् शोकु वतन वाहरावख क्याह

★ ★ ★

नगमु

तति ग्रश्मय मति गटुकारो
 शेहजारो यूर्य व्वलो
 दँद्यमतिनुय अनतु बहारो
 शेहजारो यूर्य व्वलो

सहरावस मंज़ ह्यनु आये
 छुनु मोलूम कति सॉन्य जाये
 आबि डल तय बेयि आंचारो
 शेहजारो यूर्य व्वलो

कस वनव तय बोज़ि कुस सोनुय
 सारिवुय असि कोर चोत छूनय
 लावि शबनम हति सब्ज़ोरो
 शेहजारो यूर्य व्वलो

अँहरुबलुके थदि आबशारो
 ठंडु त्रेशा सॉद्वारो
 कँहरु निशि असि रछ गुलज़ारो
 शेहजारो यूर्य व्वलो

गंगुबलु के पोशे नारो
 क्वलु बतखन लोग आमताव
 सुलि सुबहुकि रुति दीदारो
 शेहजारो यूर्य व्वलो

बालु बालय खुलु आसमानो
मल सोरुय दिलनुय कास
व्यथ साँनी दियि असि तारो
शेहजारो यूर्य व्वलो

मजबूरन वोनूनय शारो
लोल बाँगरुन तँम्य सुंद कार
ह्यनु आमृत्य् छी सरदारो
शेहजारो यूर्य व्वलो

★ ★ ★

Source: 'pādⁱ samyīkⁱ' by Arjan Dev Majboor in Persio-Kashmiri Script.

Year of publication: 1993.

Transformed into Standardised Devanagari-Kashmiri by M.K.Raina.

Work completed on 15 May 2005.
